



Հովհաննես Թումանյան

Խորհրդավոր մեռելը

Ուր որ կանգնում, նրստում եմ ես,
Ամենուրեք, անմեկին,
Աչքիս առջև դրրած է միշտ
Մի լուռ դագաղ թանկագին:

Օ՛, մի՛ հարցնեք՝ էն դագաղում
Ո՞ւմն է դալուկ էն դիակ,
Կամ թե ինչու ես չեմ թաղում
Նըրան ընդմիշտ հողի տակ:

Ոչ, չեմ կարող ես հավատալ,

Թե մեռած է նա հավետ,
Թե նա գրնաց, էլ ետ չի գալ,
Թե նա չըկա էլ ինձ հետ...

Եվ ուր կանգնում, նրստում եմ ես՝
Նա մի՛շտ աչքիս առաջին...

Ու երբ խոսում, ժրպտում եմ ձեզ՝
Ըսպասում է իմ հոգին...

Ըսպասում է ամեն վայրկյան,
Թե ուր որ է՝ հիմի նա
Պիտի շրնչի ու մանկական

Իր աչքերը ինձ բանա...

1902
